

## «Երևանի Ջերմաէլեկտրակենտրոն» փակ բաժնետիրական ընկերության կողմից բնական գազի ներկրման լիցենզիայի

### Պայմանները

(Լիցենզիա N0318, տրված Հայաստանի Հանրապետության  
հանրային ծառայությունները կարգավորող հանձնաժողովի  
2009 թվականի մայիսի 27-ի N240Ա որոշմամբ)

#### 1. Սահմանումներ

1. Լիցենզիայի պայմաններում օգտագործված որոշ հասկացություններ սահմանվում են հետևյալ կերպ.

**Հանձնաժողով՝** Հայաստանի Հանրապետության հանրային ծառայությունները կարգավորող հանձնաժողով.

**Լիցենզիա՝** Հանձնաժողովի կողմից «Երևանի Ջերմաէլեկտրակենտրոն» փակ բաժնետիրական ընկերությանը տրված փաստաթուղթ, որը հավաստում է վերջինիս իրավունքը և պարտականությունը սույն լիցենզիայով սահմանված պայմաններով Հայաստանի Հանրապետություն բնական գազի ներկրման գործունեություն իրականացնելու իրավունք.

**Լիցենզավորված անձ՝** «Երևանի Ջերմաէլեկտրակենտրոն» փակ բաժնետիրական ընկերություն.

**Ներկրող՝** Հայաստանի Հանրապետություն բնական գազի ներկրման գործունեություն իրականացնելու լիցենզիա ստացած իրավաբանական անձ.

**Փոխադրող՝** բնական գազի փոխադրման լիցենզիա ստացած իրավաբանական անձ.

**Բնական գազի փոխադրման ցանց կամ Փոխադրման ցանց՝** բնական գազի մայրուղային գազամուղների, գազաբաշխիչ կայանների, գազի պահեստարանների, կոմպրեսորային կայանների, դրանց հուսալի և անվտանգ շահագործման համար անհրաժեշտ սարքավորումների ու օպերատիվ կառավարման համալիրների (ներառյալ՝ կենտրոնական կարգավարական ծառայությունը) կազմակերպական, տեխնիկական և /կամ/ տնտեսական կապերով ու աշխատանքային ռեժիմներով միավորված համակարգ, որի միջոցով իրականացվում է բնական գազի փոխադրումը (տեղափոխումը) ներկրման, արտադրության (արդյունահանման) լիցենզիա ունեցող անձանցից բնական գազի

արտահանման, բաշխման լիցենզիա ունեցող անձանց, իսկ առանձին դեպքերում՝ անմիջապես սպառողներին, և որի սահմանազատման կետերն են՝

- 1) Հայաստանի Հանրապետության պետական սահմանի այն կետերը, որտեղ Փոխադրողի գազատարները միանում են հարևան երկրի գազատարներին,
- 2) Փոխադրողի և բաշխողի գազատարների միացման հանգույցները.

**Տորս մաժոր՝** արտակարգ և անկանխելի դեպքեր և հանգամանքներ, որոնք ստեղծվել են Լիցենզավորված անձի կամքից անկախ, ներառյալ (սակայն չսահմանափակվելով դրանցով) բնական աղետները, բնության ուժերի արտասովոր ուժեղ դրսևորումները, ինչպես, օրինակ, ջրհեղեղները, երկրաշարժերը, փոթորիկները, պտտահողմերը, նաև սաբոտաժային գործողություններ, ահաբեկչություններ, պատերազմներ, ապստամբություններ, հասարակական անկարգություններ, գործադուլներ, որոնք խոչընդոտում են Լիցենզավորված անձի գործունեությանը կամ հանգեցնում նրա ստանձնած ցանկացած պարտավորության կատարման ձգձգման կամ դադարեցման՝ հակառակ նրա կողմից գործադրված ջանքերի՝ խուսափելու, թուլացնելու կամ վերացնելու այդ ուժերի ազդեցությունը:

## 2. Լիցենզիայի գործողության ժամկետը

2. Լիցենզիան ուժի մեջ է մտնում 2009 թվականի մայիսի 27-ից:
3. Լիցենզիայի գործողության ժամկետն է մինչև 2010 թվականի մայիսի 27-ը:

## 3. Լիցենզավորված գործունեության էությունը կազմող գործառույթները

4. Լիցենզիան ուժի մեջ մտնելու պահից Լիցենզավորված անձին տրվում է Լիցենզիայի պայմաններին համապատասխան Իրանի Իսլամական Հանրապետությունից բնական գազ ներկրելու իրավունք:
5. Ներկրվող բնական գազի ծավալները սահմանվում են Լիցենզիայի անբաժանելի մասը կազմող՝ «Երևանի Ջերմաէլեկտրակենտրոն» փակ բաժնետիրական ընկերության և Իրանական գազ արտահանող Ազգային ընկերության 2004 թվականին կնքված բնական գազի ներկրման պայմանագրի համապատասխան (Հավելված)՝ հետևյալ չափաքանակով.

Առաքման տարեթվերը	Պայմանագրով նախատեսված տարեկան քանակը, միլիարդ խորանարդ մետր գազ
2009-2010	1,1

6. Լիցենզավորված անձն իրավունք չունի լիցենզավորված գործունեության էությունը կազմող գործառույթները պայմանագրային կամ այլ հիմունքներով ամբողջովին կամ մասնակի օտարել, զիջել կամ փոխանցել մեկ այլ անձի՝ առանց Հանձնաժողովի հետ համաձայնեցնելու:

#### **4.Լիցենզավորված գործունեության պայմանները**

7. Լիցենզավորված անձը լիցենզավորված գործունեությունը պետք է իրականացնի տնտեսական արդյունավետության սկզբունքներին, գործող նորմատիվ-իրավական ակտերին համապատասխան:

8. Լիցենզավորված անձը չի կարող Լիցենզիան օգտագործման տալ, օտարել կամ գրավադրել այլ անձանց՝ առանց Հանձնաժողովի հետ համաձայնեցնելու և Լիցենզիայում համապատասխան փոփոխություններ և (կամ) լրացումներ կատարելու: Լիցենզայի գործողությունը չի տարածվում Լիցենզավորված անձի հետ համատեղ, այդ թվում՝ համատեղ գործունեության պայմանագրով գործունեություն իրականացնող այլ անձանց, ինչպես նաև Լիցենզավորված անձի մասնակցությամբ հիմնադրված կամ գործող իրավաբանական անձանց վրա:

9. Լիցենզավորված անձն առանց Հանձնաժողովի թույլտվության չի կարող դառնալ Լիցենզիա ունեցող մեկ այլ անձի 25 տոկոս և ավելի մաս կազմող բաժնետեր, փայատեր կամ միավորվել Լիցենզիա ունեցող մեկ այլ անձի հետ:

10. Լիցենզավորված անձի կանոնադրական կապիտալում 25 տոկոս և ավելի մասնակցություն ունեցող բաժնետերը կամ փայատերը առանց Հանձնաժողովի թույլտվության իրավունք չունի ձեռք բերել Լիցենզավորված անձի կամ մեկ այլ գործունեության լիցենզիա ունեցող անձի 25 տոկոս և ավելի բաժնետոմս, բաժնեմաս կամ ունենալ փայամասնակցություն, ինչպես նաև վաճառել 25 տոկոս և ավելի բաժնետոմսեր:

11. Լիցենզավորված անձի կողմից բնական գազի փոխադրման ծառայություն իրականացնող անձանց հետ կնքվող պայմանագրերը պետք է համապատասխանեն Հանձնաժողովի կողմից սահմանված պայմանագրերի օրինակելի ձևերին:

12. Լիցենզավորված անձի և էներգետիկայի բնագավառում լիցենզավորված գործունեություն իրականացնող այլ անձանց միջև կնքվող պայմանագրերը պետք է գրանցվեն Հանձնաժողովում:

13. Լիցենզավորված անձը, Հանձնաժողովի կողմից սահմանված կարգին ու ձևերին համապատասխան, Հանձնաժողով է ներկայացնում տեղեկատվություն և հաշվետվություններ՝

ա) բանկերում ունեցած հաշիվների մասին,

բ) անցած ժամանակաշրջանի գործունեության մասին,

գ) հաջորդ հաշվարկային ժամանակաշրջանի ֆինանսատնտեսական ցուցանիշների կանխատեսումների մասին,

դ)երկարաժամկետ և կարճաժամկետ վարկային ծրագրերի մասին՝ համապատասխան հիմնավորումներով:

14. Լիցենզավորված գործունեության հաշվապահական հաշվառումը և հաշվետվությունը պետք է համապատասխանեն Հայաստանի Հանրապետության օրենսդրությամբ սահմանված հաշվապահական հաշվառման պահանջներին:
15. Լիցենզավորված գործունեության հաշվապահական հաշվառումը և հաշվետվությունը պետք է առանձնացված լինեն Լիցենզավորված անձի կողմից իրականացվող գործունեության այլ տեսակների հաշվապահական հաշվառումից և հաշվետվությունից:
16. Լիցենզավորված անձը պարտավոր է յուրաքանչյուր տարի՝ մինչև ապրիլի 30-ը, հանրապետական մամուլում հրապարակել նախորդ տարվա իր գործունեության ֆինանսատնտեսական հաշվետվությունը՝ համաձայն Հանձնաժողովի կողմից սահմանված ձևերի: Եթե Լիցենզիայի գործողության ժամկետը պակաս է մեկ տարուց, ապա նշված հաշվետվությունը պետք է հրապարակվի Լիցենզիայի ժամկետը լրանալուց հետո չորս ամսվա ընթացքում: Հրապարակված հաշվետվությունները չպետք է պարունակեն պետական և ծառայողական գաղտնիքներ:
17. Լիցենզավորված անձը պարտավոր է Հանձնաժողովի պահանջով իրականացնել իր ֆինանսատնտեսական գործունեության անկախ աուդիտ, այդ թվում Հանձնաժողովի կողմից առաջադրված առանձին խնդիրների վերաբերյալ:
18. Բնական գազի վաճառքի, ինչպես նաև գազի փոխադրման և բաշխման ծառայությունների սակագները սահմանում է Հանձնաժողովը: Սակագները վերանայելիս Հանձնաժողովի կողմից սահմանված սակագներից ցածր սակագներ կիրառելու հետևանքով Լիցենզավորված անձի հնարավոր վնասները հաշվի չեն առնվում:
19. Լիցենզիայի գործողության ընթացքում Լիցենզավորված անձն իր նախաձեռնությամբ, Հանձնաժողովի կողմից սահմանված կարգին ու ձևերին համապատասխան, կարող է հայտ ներկայացնել իր կողմից վաճառվող գազի սակագնի վերանայման վերաբերյալ:
20. Հանձնաժողովը բնական գազի վաճառքի սակագների մեջ հաշվի է առնում միայն այն ծախսերը, որոնք հիմնավորված և անհրաժեշտ են Լիցենզավորված գործունեությունն իրականացնելու համար:
21. Հանձնաժողովն իր նախաձեռնությամբ և իր կողմից սահմանված ընթացակարգով կարող է վերանայել Լիցենզավորված անձի կողմից վաճառվող գազի սակագինը՝ հիմնվելով Լիցենզավորված անձի ֆինանսատնտեսական հաշվետվությունների և (կամ) անկախ աուդիտի արդյունքների վրա:
22. Լիցենզավորված անձը, Հայաստանի Հանրապետության օրենսդրությամբ սահմանված կարգով, պատասխանատվություն է կրում Հանձնաժողով ներկայացրած լիցենզավորված գործունեության հաշվետվության և այլ տեղեկատվության հավաստիության համար:

23. Լիցենզավորված անձը պարտավոր է անմիջապես հայտնել Հանձնաժողովին այն հանգամանքների մասին, որոնք հանգեցրել են կամ կարող են հանգեցնել սույն Լիցենզիայի պայմանների խախտումների:
24. Լիցենզավորված անձը պարտավոր է կատարել Փոխադրող համակարգի օպերատորի օպերատիվ հրահանգները և կարգադրությունները՝ համաձայն կնքված պայմանագրի:
25. Լիցենզավորված անձը պարտավոր է Հանձնաժողով և Փոխադրող համակարգի օպերատորին անհապաղ հայտնել բնական գազի ներկրման նախատեսված ծավալների փոփոխությունների մասին:
26. Եթե Հայաստանի Հանրապետություն գազ ներկրելու Լիցենզիա ստացել են մեկից ավելի անձինք, ապա յուրաքանչյուրի փաստացի մասնաբաժինը Հայաստանի Հանրապետության սահմանում որոշվում է նրանց միջև կնքված հատուկ պայմանագրով ամրագրված սկզբունքով: Ներկրողների միջև գազի մասնաբաժինների որոշման վերաբերյալ տարաձայնությունները սահմանված կարգով քննարկվում են Հանձնաժողովում:

#### **5.Լիցենզավորված գործունեության վերահսկում**

27. Լիցենզիայի պայմանների պահպանման վերահսկումը իրականացնում է Հանձնաժողովը:
28. Լիցենզիայի պայմանների պահպանման վերահսկումն ապահովելու նպատակով Հանձնաժողովը և նրա կողմից լիազորված ներկայացուցիչներն ունեն ազատ մուտքի իրավունք Լիցենզավորված անձի տարածք: Լիցենզավորված անձը վերահսկման իրականացման ընթացքում պետք է լիովին համագործակցի և աջակցի Հանձնաժողովին կամ նրա կողմից լիազորված ներկայացուցչին:
29. Հանձնաժողովի կողմից լիազորված ներկայացուցիչները Լիցենզավորված անձի տարածքում պահպանում են ընկերության ներքին կանոնակարգը, ինչպես նաև Հայաստանի Հանրապետության օրենսդրությամբ սահմանված նորմերը:

#### **6.Տույժեր**

30. Լիցենզիայի պայմանները չկատարելու, ոչ պատշաճ կատարելու կամ խախտելու դեպքում, ղեկավարվելով «Էներգետիկայի մասին» Հայաստանի Հանրապետության օրենքի 42-րդ հոդվածով, Հանձնաժողովը իրավասու է կիրառել հետևյալ տույժերը.
- ա) նախազգուշացում,
  - բ) սակագների նվազեցում,
  - գ) Լիցենզիայի կասեցում,
  - դ) Լիցենզիայից զրկում:
- Նշված տույժերի կիրառման կարգը սահմանում է Հանձնաժողովը:

31. Լիցենզավորված անձին Լիցենզիայից զրկելու դեպքում Հանձնաժողովը և Լիցենզավորված անձը ղեկավարվում են «Էներգետիկայի մասին» Հայաստանի Հանրապետության օրենքի 52-րդ հոդվածով և Հայաստանի Հանրապետության օրենսդրությամբ:
32. Լիցենզիայի գործողությունը կարող է դադարեցվել Լիցենզավորված անձի նախաձեռնությամբ՝ նրա գրավոր դիմումի հիման վրա: Մինչև Լիցենզիայի կասեցման կամ զրկման մասին Հանձնաժողովի կողմից համապատասխան որոշում կայացնելը, Լիցենզավորված անձը պարտավոր է շարունակել իրականացնել գործունեությունը՝ ղեկավարվելով «Էներգետիկայի մասին» Հայաստանի Հանրապետության օրենքի 52-րդ հոդվածով և համաձայն Լիցենզիայի պայմանների:
33. Լիցենզավորված անձը չի ենթարկվում պատասխանատվության՝ սույն Լիցենզիայի 6.1 կետով սահմանված տույժերով, եթե նրա գործունեության մեջ արձանագրված խախտումները ֆորս մաժորային հանգամանքների հետևանք են:

## **7.Լիցենզիայի պայմանների փոփոխություն, Լիցենզիայի կրկնօրինակի տրամադրում**

34. Լիցենզիայում փոփոխություններ կատարվում են Լիցենզավորված անձի կամ Հանձնաժողովի նախաձեռնությամբ՝ Հանձնաժողովի կողմից սահմանված կարգով:
35. Լիցենզավորված անձի վերակազմակերպման կամ նրա անվան կամ գտնվելու վայրի փոփոխման դեպքում Լիցենզավորված անձը պարտավոր է այդ փոփոխություններն իրավական ուժ ստանալու օրվանից սկսած՝ 15-օրյա ժամկետում հայտ ներկայացնել Հանձնաժողով Լիցենզիայի վերաձևակերպման համար՝ կցելով նշված տեղեկությունները հավաստող համապատասխան փաստաթղթեր:
36. Լիցենզավորված անձը 15-օրյա ժամկետում ծանուցագրով տեղեկացնում է Հանձնաժողովին իր իրավաբանական հասցեում, հիմնադիր փաստաթղթերում և բանկային հաշվեհամարներում տեղի ունեցած փոփոխությունների մասին:
37. Լիցենզավորված անձի բաժնետերերի (հիմնադիրների) փոփոխման դեպքում Լիցենզավորված անձը պարտավոր է դիմել Հանձնաժողով՝ Լիցենզիայի պայմաններում անհրաժեշտ լրացումներ և փոփոխություններ կատարելու համար:
38. Լիցենզիայի կորստի (կորցնելու, ոչնչանալու և այլն) կամ գործողության ժամկետի երկարաձգման դեպքում Լիցենզավորված անձը պարտավոր է հայտ ներկայացնել Հանձնաժողով: Լիցենզիայի կրկնօրինակի ստացման և (կամ) ժամկետի երկարաձգման ընթացակարգերը կարգավորվում են Հանձնաժողովի կողմից ընդունված իրավական ակտով:

## **8.Ծանուցում**

39. Լիցենզիայի վերաբերյալ պաշտոնական բոլոր ծանուցումները, հայտերը, պահանջները կամ այլ հաղորդագրությունները պետք է լինեն գրավոր և ուղարկվեն սուրհանդակի միջոցով կամ պատվիրված նամակով: Ցանկացած ծանուցում կամ հաղորդագրություն ուժի մեջ կհամարվի ստացման պահից կամ, եթե այն չի ստացվել հասցեատիրոջ մեղքով՝ ներկայացման պահից:

